

蕉

廊

脞

錄

蕉廊脞錄卷六

錢塘吳慶坻撰

吳興劉承幹校

涿州馮俊甫孝廉貽我遼刻石經柱拓本八紙柱凡八面俗稱爲八稜碑沙門惟和書首行文曰大遼涿州涿鹿山雲居寺續祕藏石經塔記又得房山西峪寺石經拓本凡一百二十三紙則俗所稱小西天寫經是也

涿州城東北隅有雙塔俗呼爲南塔北塔者塔前有金天會十年智度寺供養塔燈記又明嘉靖十三年重修智度寺鐘鼓樓碑又嘉靖十四年新建智度寺天王殿

記碑頓說撰 國朝順治二年重修智度寺碑馮銓時

爲禮部尙書宏文院內院學士按二塔皆唐時建智度

寺在南塔下雲居寺在北塔下寺久圯二塔皆完好塔

四周刻佛像累石圍之石上書護塔之石四字下書善

人某某造或一二人或十餘人無年月北塔下有遼碑

一乾純元碑一至元十二年王岫撰明碑三嘉靖十二年王道撰

撰崇禎十六年唐誠撰天會碑前列鄉人將仕郎試大理評事李

端謀撰同泰寺沙門法誥書後列邑長彰信軍節度使

金紫崇祿大夫檢校太保知涿州軍州事清河縣開國

子食邑五百戶張元徵中散大夫起居郎同知涿州軍

州事都騎尉東陽縣開國男食邑三百戶賜紫金魚袋
益獬涿州軍事判官文林郎試祕書省校書郎張綱案
元徵見金史張汝弼傳碑所結銜與史合惟崇祿大夫
乃遼避太宗諱光改崇見遼史百官志意金初沿襲未
改歟祕書省据志當作祕書監

雅州府城東二十里

一作十里

姚橋鎮有高孝廉祠祀漢

高君貫方貫光兄弟中爲景賢堂堂之側高君碑在焉
完好微有缺損昔韓小亭觀察泰華始訪獲此碑于野
扶而植之咸豐六年丙辰何子貞編修視學來訪碑碑
在榛莽中屬雅州知府張君雅安知縣王君建祠移碑

祠中碑側觀察編修皆有題識余於己亥三月按試宜遠先經雅州謁祠讀碑尋訪高君闕問土人無知之者一縉夫獨能識其處因紆道行田塍間望見石闕下興仰瞻一闕文曰漢故益州太守武陰令上計史舉孝廉諸部從事高頤字貫方隸書二一闕文曰漢故益州太守陰平都尉武陽令北府丞舉孝廉高君字貫光隸書四右闕下層一柱壞上層橫列隸書二十四字與闕文同闕前後上下及左側刻畫人物車馬之屬約百餘種徘徊久之按洪氏隸釋以爲高頤一人之闕王氏輿地紀勝碑目以爲高君兄弟二人之闕顧南原隸辨是洪

而非王海昌錢鏡江大令保塘清風室文鈔漢高君二
闕跋定爲高君兄弟二人之闕隸辨云兩闕一有高君
名字一不稱名而字缺其一予所見六十年前石刻貫
字之旁刻云缺一字近世所見乃有以光字補之者慶
坻屬雅安令唐君樵拓眎之光字明熹旁刻三字蓋已
磨去矣

涪州江中雙石魚 先曾大父小羅浮山館詩鈔有鑑
湖石魚篇云石刻雙魚一銜芝草一銜蓮花官是邦者
有循良績則見明吳江陳良謨知涪州江中石魚出者
三江中有宋元明人題名姚彥侍方伯爲川東道時得

石魚題名百餘種北宋二十三南宋六十三元十一明
以來不錄石魚在江心非冬春水涸不得見椎拓者少
故大半完善而蜀中金石諸書卒未箸錄物之晁晦固
有時耶余入蜀晚不獲覩方伯拓本聞王詠齋文所述
如此

德陽縣黃許鎮道左有石刻上庸長三字光緒九年知
縣吳鼎摹刊旁有跋云鎮北有漢上庸長司馬君孟臺
神道見顧南原隸辨碑久蕪晦學使南皮張公時得之
今殘石尙存字多剝落惟餘三字可辨因以原碑輦輒
封護之而別刻三字於此余因紆道訪原碑上庸長三

字摩挲可識字體峭拔碑陰存上半螭首完好無損按隸辨引字原云在漢川今爲漢川州屬成都府實則碑所在已隸德陽縣境德陽距漢州四十里明代德陽縣故屬漢也

梓潼縣武連驛覺苑寺有顏魯公書逍遙樓三字碑款識二行前一行口口十年十月六日宿武連縣尉郭凡十五字以下剝落不可辨後一行大歷五年正月一日顏真卿書按山西金石記蒲州府逍遙樓有顏魯公大字石刻又廣西臨桂亦有摹刻每字徑二尺七八寸後署大歷五年正月一日顏真卿書則此碑亦後人所摹

刻耳

梁天監十三年題名石刻在雲陽縣磨厓椎拓者少字極完整文曰天監十三年十二月鄱陽王任益州軍府五萬人從此過故記之後有宋人題字四行曰嘉定九季花朝前七日同郡鄭子思爲拂塵於六百九十八年之後□□二字樞黏上一字似是王字下一字似是屯字其下有異趙錦夫侍行德顯天麟十字最後小字二行云元祐八年十二月廿七日因打碑遊此記之按梁書鄱陽忠烈王恢文帝第九子天監十三年以荊州刺史遷益州武帝本紀及恢傳同是蓋其入益州時題名

也先伯祖曼雲公視壽堂詩鈔有雲陽山中觀梁天監
十三年鄱陽王題名詩

杭州陸軍協司令部築營於饅頭山上山舊名吳家山
其地多塋墓內有面東一穴壙堅固逾常力破而入棺
木完好棺上紅帛銘旌金書敕授文林郎河南道監察
御史晉封奉政大夫諱且口按此字已模糊顧公之柩
凡二十五字塚內有磚刻銘一文曰康熙三十一年歲
次壬申癸丑月二十七日寅時先侍御易簀自銘銘曰
物必趨於盡兮理必然也曰舍故而就新兮吾未能掉
臂而入也唯委順而遷化兮斯古今才不才之所共習

也康熙四十三年歲次甲申十二月丙子日不孝男之
珽泣血百拜敬書藏於吳家山之塋域按顧且菴名豹
文杭州府志有傳先高祖杭郡詩輯錄其詩之珽字月
田亦有詩後嗣式微無人守墓亦可悲已

浙江巡撫署之東偏有鎮東樓在保安橋側明萬歷癸
未建樓下有碑首行曰浙江開府鎮東樓記碑文爲資
政大夫太子少保兵部尙書兼都察院左副都御史奉
命總督薊遼保定諸軍事前巡撫浙江賜飛魚蟒龍服
食從一品俸餉梁張佳胤撰按明史萬歷十年春杭州
兵變浙撫吳善言不能治命佳胤代善言一月而亂遂

定文敘平亂事頗略似惑於形家言以省城舊有鎮海

樓

今存卽俗稱鼓樓者是

乃建茲樓以配之佳

庠

字可發己丑進士江西萬安人

乃伐石補刊張文則甲申四月也佳

庠字肖甫嘉靖二十九年進士官至兵部尙書加太子

太保自薊遼召還理部事尋爲御史彈劾謝病歸卒贈

少保諡襄敏工詩有嵒嶽山房集陳臥子稱其莊雅爲

李王後勁余修郡志蒐訪明以前石刻得之杭人殆無

知是樓緣起者

咸淳臨安志載宋理宗御製伏羲以下迄於孟子贊各

一首暨詔諭刊碑十六賜國子監卽玉海所謂道統十

三贊是也明正德間移立杭州府學碑石尙完備 國朝倪濤山友武林石刻記闕文王一石阮文達兩浙金石志錄潛志舊文補之光緒元年乙亥丁竹洲丈摘取十五碑中字摹寫成文不足者更配合上下偏旁集刻補之築廊屋以護之顏曰道統石室十八年壬辰修治府學尊經閣於後圃得原刻文王贊一石閱六百年神物重還可謂奇矣

壽松堂孫氏藏潛化閣帖宋刻原石爲孫景高先生仰曾藏度置寶石峰下寶石山莊莊久廢今石存孫仁甫炳奎家略有斷缺帖後梁山舟學士跋云往余於先叔

祖深父先生齋頭見舊拓閣帖石本也而上有銀錠鑲
紋相傳宋時賈相門客從賜本摹出故仍棠梨之舊今
春孫君景高於西吳舊家購得帖石若干枚洗剔苔蘚
椎拓一本示余精采煥發絕類宿觀覓前帖校一過凡
字迹波磔石片剝蝕之處無毫髮差殆宋刻原石無疑
惟失去鍾繇及謝萬書數百字耳辛丑臘日景高自跋
云余素嗜石刻每見傳揚舊本輒愛翫不釋手欲仿寶
晉停雲之韻事哀刻以供墨林清賞而未逮也張君芑
堂爲余購得閣帖舊石若干枚於禾中故家剝剔苔蘚
聯綴斷裂椎拓一本取佗本十餘種參校無有同者汪

君天潛出示梁氏所貽深父先生鑒定藏本校之纖毫無不昭合蓋卽此石原拓也委弃有年摹拓絕少故豐神完美就中與諸本尤異者卷三瓊之頓首下有秋字卷七朱處仁帖後增服食帖三行皆可補諸家釋文所未備初購得時缺魏鍾繇宣示帖及謝萬書三行閱數月芑堂復於原所藏處搜訪得之遂成完璧壬寅九月谿州銅柱在辰州府五代馬希範據南楚谿州峒蠻彭士愁寇辰澧二州希範遣將劉勅討之士愁遣子師曷以五州降附希範慰賚之令仍守其地希範自謂漢伏波將軍援之苗裔乃鑄銅柱銘戰功以踵故事學士李

宏臯爲之記柱高一丈二尺入地六尺下有石蓮花臺四面刻字余在湘得拓本文中引伏波銅柱銘有曰金人汗出鐵馬蹶堅子孫相連九九百年其語不類漢代文字疑爲臆造惟歐陽公五代溪州刺史彭士然柱文實作彭士愁可以證前史之誤

湖南學政衙門其先爲長沙府知府署相傳後漢時長沙太守韓玄城破死難其墓卽在今大堂煖閣下凡知府履任者多不利或謂學政爲 欽差官當可鎮壓於是兩署互易故學政署規制不逮府署之廣大署中大堂西有老樹一其高參天相傳爲韓公手植至今時有

神異又大門內庭左有大鐵鑊一亦韓公時故物壽陽
祁文端公窩藻爲學政時有神木鐵舖二詩刻石壁間
神木詩云神木神木堂西廂槐身楮葉相抱藏中有赤
心通朝陽朱衣導從候來去云是韓公神所據三年借
爾蔭清風下無蒼鼠上無蟲鐵舖詩云鐵舖鐵舖門兩
腋腹奄脣厚徑五尺雨痕沈綠土花赤伊誰鎔鑄誰轉
移云是韓公飲馬池三年借爾鑑容止此中只貯湘江
水

光緒甲午正月黃仲弢前輩得于忠肅公填河鐵犀銘
拓本凡八行第一行填河鐵犀銘五字銘六行文曰百

煉玄金鎔爲眞液變幻靈犀雄威赫奕填禦隄防波濤
永息安若泰山固如磐石水怪潛形馮夷斂迹城府堅
完民無墊溺雨順風調男耕女織四時循序百神効職
億萬閭閻措之衽席惟天之佑惟四字提行帝之力

帝字以下提
行高一格

爾亦有庸傳之無極銘凡六行銘前一行

填河鐵犀銘五字末一行正統十一年歲在丙寅五月
吉旦浙人于謙識十八字後有道光戊申七月旣望劉
師陸跋云黃叔瓚中州金石攷引闔興邦鐵犀鎮河廟
碑記云出大梁之安遠門東北隅四里許有回龍廟後
有鐵犀一狎狎蹲踞半出土上背鑿銘乃正統丙寅巡

撫于忠肅所鑄以鎮水患者闢賊圍汴曾用萬夫移犀
他所千鎚百煨聲聞十里挾旬不能損其金軀僅於左
脇下穿一穴王子埋沒土中後人剔地而得之視其銘
詞隱隱隆起若商周彝鼎銀鈎無損良有神呵護矣其
銘曰云云文不重錄道光癸巳歲余客大梁嘗訪其地親至
所謂回龍廟者殿宇數楹梁柱締構頗新惟周垣未葺
問之土人謂數年前有議重修者庀材未竟而止中祀
神座神牌尙存乃明季泊 國朝有功於民社宣防者
殿外亭基上鐵犀宛然在焉銘文及前後題識分別犀
背左右各四行鎮河鎮禦並作土旁百神効職黃攷作

百辟蓋誤余摩抄文字確是鑄成非鑿出者流賊鑑
經旬卒未能損其全體迄用狡謀灌城而犀終以土得
完迨二百餘年之後猶若新發於硯及余訪得時四百
餘年矣聞癸卯乙巳兩歲大梁再經水患環城皆水回
龍廟者諒已同在波流犀縱尙存當亦沈埋沙礫中未
知其出又在何時今日曝書拾得紙本不勝慨然時正
荆江盛漲之時因取裝池贈防江諸同事且存金石舊
話云按明史職官志巡撫河南等處地方兼管河道提
督軍務一員宣德五年遣兵部侍郎于謙巡撫山西河
南又本傳宣德初增設各部右侍郎爲直省巡撫忠肅

由御史超遷兵部右侍郎巡撫河南山西在官九年遷左侍郎時王振方用事有御史姓名類謙者嘗忤振謙入朝薦王來孫自代通政使李錫阿振指劾謙以久不遷怨望擅舉人自代繫獄三月已而振知其誤得釋左遷大理寺少卿山西河南吏民伏闕上書請留謙者以千數周晉諸王亦言之乃改命謙巡撫前後在任十九年正統十三年以兵部左侍郎召明年秋遂有土木之變此鐵犀蓋忠肅再撫河南時所鑄巡撫兼管河道而宣德元年以後河屢溢開封正統二年決濮州范縣三年決陽武及邳州越數年又決金龍口陽穀隄及張家

黑龍廟口河患無歲無之宜忠肅之懃懃於此也潘氏
乾坤正氣集所錄有誤字可藉以正之拓本破損余爲
重裝丙申三月朔祭忠肅祠敬奉歸祠中永永珍守並
要同郡諸子題識焉

江干徐村俗所稱九龍頭者美國教士設之江學堂丙
辰春拓地建築掘得一古墓有二棺又銅像一作壽星
騎鹿狀盃盃二磚刻地券文一文凡十五行首行順刻
次行逆刻以後各行皆然顛倒讀之文近俚而語絕詭
異謬託於仙鬼之說蓋全仿南漢馬十二娘地券之文
王定叔拓以見示錄之以廣異聞文曰惟大明國大明

提行 浙江杭州府仁和縣義同坊二圖土地范明大王

大王以下爲第二行卽倒寫 祠下居住信士郎斗金奎金壁金有父

親郎兆玉別號明懷賜 賜字提行 進士第奉政大夫直

隸淮安府同知於天啟六年六月十四日戌時往九仙山採藥忽遇大仙賜酒三杯醕酏一夢不還就憑白鶴仙指引用九萬九千九百九十九貫文買到皇天后土王真龍福地一穴坐落錢塘縣定北五圖徐村土名顯聖隴三位夫人祠下東至青龍西至白虎南至朱雀北至玄武上至青天下至黃泉今具六至明白給付與明懷翁爲萬年陰宅倘有邪神野鬼魑魅魍魎侵僭穴

者將券投至東嶽聖帝案前以法驅遣自安葬之後福
蔭科甲聯芳位登台鼎子孫榮盛永保千秋此券天啟
天啟以下提行

七年七月二十一日申時立券人皇天

后土王

押

下列三行牙人張堅固

押

李廷寶

押

代書人白鶴仙

押

四押字作篆文曰榮華富貴

地券 二大字作篆文

按天啟七年至今丙辰二百九十六年乃爲外人所發
掘可謂奇劫即兆玉字完白別字明懷萬曆癸丑進士

著無類生詩集西湖金沙港先覺祠列名入祀子璧金字公是工詩嘗刊五雅固杭州舊族也

癸丑之歲湖州烏程縣某鄉新出宋故十進士衛公壙記文凡十行語頗簡質衛君諱毅夫字子剛世居嘉興府華亭縣淳祐改元八月葬於安吉州烏程縣澄靜鄉朱陽之原是年八月孤子國寶國卿書末行小字曰雲邑朱春刊宋時華亭縣屬嘉興府理宗寶慶二年改湖州爲安吉州皆與志合惟十進士之名未詳石爲王鷹瞰生所藏余得拓本亟付顧輔卿俾補入通志金石云劉聚卿藏吳越金塗塔拓本爲吾鄉魏稼孫手拓全塔

具備曩聞楊見心復言所見拓本甚多謂當日造塔時以保安人民四字分鑄其陰按金石契樞刻金雲莊藏者是入字陳默齋藏者是保字此拓本陰十九字同下一字似是保字而不甚明晰又余子士鑑京師得一拓本乃是金字疑八萬四千之塔分字標題殆不止如見心所云者自來著錄家皆無攷證不敢臆說塔爲周世宗顯德乙卯造實俶嗣爵之八年至明歲乙卯蓋十六甲子矣山河幻影宮殿荒蕪鷹虎剗刳人天慘澹讀吾宗聖徵祭酒題句不禁爲之一回腸一盪氣云

雲泉山風水洞唐人題名

左列凡七行

前國子監四門助教武儒衡元和二年二月□日題

吳興沈岫元

此下脫和字

二年正月三十日題

殿中侍御史內供奉鄭敦禮元和二年五月七日赴新

下似尙有二三字不可識

□似是睦字

州刺史李幼□元和元年十一月廿九日題

饒州刺史李夷簡上□遊元和二年四月十二日題

范陽盧纘元和四年

年字全闕以文義定之

十月廿五日□□富

陽令鄭晔□□後到

凡四行此獨右行

監察御史李事舉杭州刺史賈全大理司直王□□□

□□□□

凡四行第四行字不可辨石亦斜滿

吳越國投太湖水府銀簡拓本一玉簡拓本二劉蔥石
參議藏銀簡拓本舊藏嘉興鮑少筠吳江翁海村玉簡
拓本則上虞羅叔韞以贈劉者海村跋云順治元年夏
吳中大旱太湖龜坼簡村居民於湖底得錢武肅王龍
簡蓋投水府之告文也其文一百七十九字其質白金
重四十兩長五寸四分廣三寸七分翁之外祖沈拙齋
欲以銀四十易之不可乃假拓數十紙藏之後聞其家
卒銘廢之幸有拓本流傳人間今錄其文曰大道弟子
天下都元帥尙父守中書令吳越國王錢鏐年七十七
歲二月十六日生自統制山河主臨吳越民安俗阜道

泰時康市物平和遐爾清晏仰自蒼昊降祐大道垂恩
今則特詣洞府名山遍投龍簡恭陳醮謝上答玄恩伏
願合具告祈兼乞鏐壬申行年四時履歷壽齡遐遠眼
目光明家國興隆子孫繁盛志祈玄祝允協投誠謹詣
太湖水府金龍驛傳於吳越國蘇州府吳縣洞庭鄉東
舉里太湖水府告文

寶正二年歲在戊子三月丁未二十六日壬申投 玉

簡長三寸五分廣二寸八分文略同惟伏願下多年年

無水旱之州

釋者謂是災字

歲歲有農桑之樂二語少合具告

祈四字楷法略似麻姑仙壇記拓本極精

曇山朱文公題名 左行

紹興甲寅閏十月癸未朱仲晦父南歸重游鄭君次山園亭周覽岩壑之勝衰回久之林擇之余方叔朱耀卿吳宣之趙誠父王伯紀陳秀參李良仲喻可中俱來字秀拔無一筆漫漶者

唐故徐處士故朱氏夫人墓誌銘

并序一行 文十六行 銘四行

夫人姓朱義陽人也系本陸終第五子安仁之後先封安仁爲曹姓食菜於周佐武王伐紂於邾後爲楚滅去邑爲朱氏吳標四族周隱七賢繼廿英豪布在方策由漢朝錦衣太守公處於會稽自斯一家遂爲越人也

夫人稟性淑順幼閑女儀望族移天正於東海徐氏雍
雍著代肅肅承宗長若琴瑟之和不替女賓之敬實人
倫之軌範亦閨梱之徵猷年纔甲子一周懿夫先殞

夫人在疾樂業資生德長家豐鄉閭益敬冢男邱女婚
媵近周稚女童兒冠笄未備母能慈訓子等白眉天假
夫人之奇姿不假夫人之永壽以開成五年二月二日
邁疾不愈全而歸之勦于私寢享年六十有七育子十
有二人伯曰沛曰澤叔曰慶曰政季曰鼎曰遇長女媵
余氏次適於王仲女未正先 夫人而口次納王氏禮
有請期季女二人幼而可喜以其年九月廿四日窆于

下曰浦首北去海塘一百餘步去懿夫墳西三步墳作
丙向之原禮也嗣孝楚毒悲感無時號□□泣枯其
淚內外霑涕日慘風悲龜筮旣從□□宅兆慮邱阜改
彭彭字士鑑於敦煌石室經典釋文唐卷子殘本見尙
書於變字正作彭下注古變乃定爲變字勒石載辭鳴
呼哀哉迺爲銘曰

有美一人

性善若水

其德貞順

其容端美

年周甲子

良人已喪

帷殯晝哭

情同敬姜

平沙之垠

激澥之陽

夫人新墳

馬鬣封方

列生之行

刊石爲銘

萬古千秋

永口幽瑩

右唐徐處士朱夫人墓誌銘在餘姚縣某鄉光緒某年出土翁又魯教授得此石以貽其戚西湖壩魏君今藏魏氏

文內勦字義未知所本

壬子八月梁節庵謁曲阜孔子廟復徧謁周公顏子之廟於顏子廟得至元殘石一命工拓歸見貽石上截已斷缺下截存字七行第一行僅一銘字二三行行八字曰雲篆其中玉壽其德帝翊斯文子孫千億四行至七行行五字曰稷埜遺民爲洙泗主人銘至正乙酉仲

冬吉日謹誌惜其人姓氏翳如要是宋之遺老山東郡
縣久淪於金縣歷至元而猶不忘宋室自號遺民其志
亦可哀矣

樊樊山辟地滬上銳意爲詩憂時感事一寄於篇什問
亦填詞其題士鑑九鐘精舍圖詞云第一鐘魯遽遺篆
刻螭龍萬年永寶雲仍用筋頭垂玉土花繡綠曲阜古
城東第二鐘翰林得寶似宏農南齋書畫勤供奉花甌
散直墨池洗硯辛苦校魚蟲第三鐘翰林攷据阮兼翁
高齋彝鼎多清供榮發製作蒲牢款識聲采滿寰中第
四鐘吉金摹入刻藤中蒼然萬竹瀟湘夢國香九碗靈

文九曜看畫卷簾櫳第五鐘似庭箕箒不成龍鼓鼙北
嚮山陵動湘靈鼓瑟漸離擊筑非復舊笙鏞第六鐘液
池鷓鴣散秋風天津橋畔聞鶉痛雁門跼矣

君病足居天津西

山傾矣聲應洛陽銅第七鐘老萊衣綵返江東白華詩
好吹笙送臣忠子孝華鯨一吼棒喝震羣孽第八鐘回
思長樂一林楓聞鐘醒了春婆夢玉堂天上黃冠海角
開卷意何窮第九鐘紀羣間著不才融東南耆舊如星
鳳休休亭裏打鐘掃地莫唱白鳧翁跋云九鐘出於已
酉圖作於庚戌余題辭在壬子三四年間天崩地坼九
廟龍箕震虩不宥黃浦相逢同悲彼黍以九張機舊調

寫之其聲哀以思矣右詞九章自第五章以下假物抒
懷撫今追昔蓋不勝故君亡國漂搖風雨之悲水雲捶
琴皋羽碎竹同茲激楚益復纏綿我讀之淚涔涔下也
九鐘者余子士鑑在京師所得宣統己酉始出土在曲
阜縣西南十里鐘大小各不相侔銘文同而行數多寡
字數疏密篆體變化均不相襲文曰魯遠作酥鐘其萬
年子子孫孫永保用高士鑑爲攷證一篇定爲魯卿大
夫名原者卿大夫得用樂縣一肆此編鐘當十六枚今
僅得其九耳長沙王祭酒師稱其引据經傳頗爲精覈
閩縣林畏廬紆爲繪九鐘精舍圖並精拓九鐘於後將

徧徵題詠以張之

李忠毅公以勦海寇蔡牽力戰死天下惜之一時弔挽詩至夥余讀宋芷灣湘一首最奇崛寫忠肝毅魄颯爽如生其詩曰入海斬蛟登山射虎壯士出門寸心報主生也臣不敢知死也臣不敢辭臣知殺賊而已焉知生歸死歸汝賊蔡牽汝何么麼海水四晏無風鼓波汝賊蔡牽汝何多狗信信血入千里牙口汝賊蔡牽我來將軍將軍飛來汝聞不聞汝賊蔡牽汝何不柁上天入地將軍殺我汝賊蔡牽汝何不弓出日入月將軍如風汝賊蔡牽汝何不死罪大海小將軍守此迷迷離離將軍

之旗歌歌舞舞將軍之鼓將軍曰刀蒼天晝高將軍曰
矢怒潮夜死吁嗟乎臣不滅賊臣甘死賊臣且滅賊臣
竟死賊海水無情天風盡墨臣北面稽首謝天子聖德
天子無悼臣臣死臣之職大海蕩蕩天所圍雲車風馬
神靈來上帝許我梟厥魁明年蔡牽死戰士休徘徊龍
宮開靈風回

么妹黔中土司龍躍之妹也其祖爲黔苗長方吳三桂
據滇時檄諸苗策應獨與抗滇平論功賞總兵官四世
至躍秩遞降爲千總嘉慶初南籠狃苗滋事督軍檄躍
赴軍躍疾作遣么妹統所部三百人詣營聽指揮戰屢

捷是年八月十五夜破南籠賊巢擒其渠王囊仙章七
絡鬚所遣八路軍么妹其一也督軍錄躍功而重賚么
妹遣之歸大興舒鐵雲位在軍中目擊其事震澤趙良
甫函作么妹歌良甫少負才氣十四試不得售嘗從楊
蓉裳芳燦游與顧蒹塘蘭厓徐廉峰楊伯夔齊名有同
岑五家詩之刻所著有樂潛堂詩集八卷菊潛菴剩稿
三卷飛鴻閣琴意詞二卷又當時有平良仄良之目平
良者曹按察楸堅亦工詩以兩人皆字良甫而曹趙音
相近也

如皋冒鶴亭廣生刊瑞安黃叔頌仲弢昆仲之詩曰二

黃先生集余獨憾吾師漱蘭先生詩無可蒐緝先生不以詩名而敦崇氣節時流露篇什間嘗見先生題丁氏雙烈圖七絕三章亟錄之亦吉光之片羽也詩云宏光殘局最傷神椎布能將正氣伸愧煞急裝諸婦女苦隨馬上窄衫人

明南京之變馬士英窄衫小帽躍馬出城隨行婦女皆急裝

婦節臣忠

等可哀更從九死別奇侅當時淺水西洋港一躍何曾

了念臺

巖山先生扁舟辭臺躍西洋港水淺不死絕勺水十三日然後正命

哦詩握翦紹

先芬二百年來雙節聞此幘君家猶木像永維忠孝到仍雲又於袁忠節木明樓集得附刊先生詩四章并錄之感事云邊將空吹月夜笳使臣枉泛海天槎世無士

雅雜聲惡廷少文貞豸角邪榻畔他人斲我室域中今
日算誰家處堂別有怡然趣燈火笙歌度歲華 青蠅

俟我海東隅敢道餘年強自娛運值奇窮招鬼侮病甘
坐廢厭人扶心真寒極腸猶熱愁到濃時淚轉枯生不
嫌遊嫌死晚眼看淨土豢狼獾喜聞壺公奉 召入都

云龕拯端須仗異材時屯陽九鬱雲雷推枰從古諮長
算乘傳親承敕外臺度實贊予淮蔡定光留作相洛師
來武昌柳亦知攀戀一一陶公手自栽 弱喻強張局
勢艱機神無滯在心閑國工始辦刀圭用羣策方收履
屐間括地象圖形便在通天犀帶內臣放披忱入對天

章閣一豁籌邊 聖主顏

李愛伯先生詩關掌故者多先生歿後無爲之續刻者
余嘗錄四君詠四章不獨存先生詩也先生詩文稿多
在日記中越縵堂日記起咸豐閒迄光緒己丑凡四十
餘冊今石印本闕最後一函蓋己丑以後之六年此詩
作于壬辰先生詩佚者多矣惜哉勤果鄉先正未接音
塵文恪則累世交親余與兒子士鑑又同出公門旣聞
緒論閣文介鄧鴻臚奏疏皆夙所心折十年以來風流
頓渺蓋不禁人亡國瘁之感云 四君詠并序云四君
者故兵部尙書山東巡撫大興張勤果公曜故東閣大

學士朝邑閻文介公敬銘故鴻臚寺卿歸善鄧君承修
故工部尙書壽陽祁文恪公世長也余與鄧君雅故同
官於朝朝夕相聚蓋十餘年勤果則自西域入朝始相
見甫半載別去而書問殷殷踰於故交文介來長戶部
僅以公事相見曹署三年中不過四五也然折節於余
肯受余之盡言有故交執友所難者文恪久官京師撫
塵曠絕三十餘年中嘗兩遇於廣坐及同官臺中甫數
月亦惟公事旅見二三次而相期甚至以古人見待四
君皆一時偉人其所建樹或已顯於世或不能自見而
守正嫉邪孜孜爲國鴻臚年少余十餘歲事余在師

友間忼槩奮迅風采照天下卒以此爲要人所忌鉏鋸
去官乞歸養親又爲大吏所齟齬鬱鬱以死尤爲可悲
中丞以儒家子納秩從軍二十餘已立功河朔及從左
文襄出師關外萬餘里掃穴犁庭疏勒烏孫復歸版籍
奇績軒天地至填撫齊魯治河尤有勞然其歿也以東
三省邊界多事欲整率舊部效命黑山白水間嘗詒書
於余懍懍以身將老諸帥多死思盡力爲國捍邊余未
及報而訃至所謂歿而猶視者相國以治賦僞嘗司胡
文忠曾文正軍餉人比之劉晏清操絕俗其入掌邦計
倣國計簿綜括天下財賦句稽出入世頗以聚斂目之

然爲 國家計久遠竭盡心力追劾戶部三貪吏逮捕
浙人大猾胡某尤快人心黜去曹郎不職者十餘人不
顧嫌怨及入政府卒以剛勁爲織人所扼沮纍萬端

主眷遂衰憂危去 國身後 贈典猶從減削司空承
其家法廉靜自持晚際時艱懃懃憂 國雖不自表異
而遇事守正比長冬官時同事者巧宦取容曹司承風
諧媚競利習爲故然深痛疾之而不能勝居常邑邑至
歿之日家無餘資嗚呼四君皆躋通顯而其旣也皆不
得意於世中丞遭際爲最亨然歿後負累鉅萬聞其病
甚時至斥距醫藥求速死是皆可悲也余窮於世交游

幾絕而如中丞鴻臚之傾心投分相國之折節司空之
引重有踰於尋常萬萬者自昔年歲在辛卯中丞薨於
歷城年甫六十今年歲在壬辰相國薨於虞鄉年七十
六閏六月鴻臚卒於家八月司空薨於位年六十八感
哲人之繼逝傷吾生之僅存夫傷鄧歎張交期恒有若
文介文恪未嘗有杯酒之歡從容之雅然而袁宏之賦
士行豈爲胡奴孫綽之泣眞長何干季野蓋燥濕之應
不以高下殊膠漆之投不以久暫判銅山崩而洛鐘應
桑葉落而長年悲豈特郢斤輟操牙絃絕響蓋彌有林
焚鳥槁川竭魚枯之痛焉逝者不作後世難誣徐孺莫

難或生芻之未具林宗慟野知大厦之難支儼紫陽之
續騷我有兼痛較昌黎之哀董彼止私情小雅能誹長
歌當哭各爲一詩以弔之後之覽者可以悲焉

尙書奮孤童束髮事戎壽一戰摧黃巾氣已無河朔

積伐開汴藩方伯少年獨

用晉書荀
美傳語

誰何彈章來吹毛

恣趨起

文宗惜將才

特詔付軍幄橫行雖回改專

征實董督拜

命益感厲殺賊日馳逐遂成嵩武軍千

里掃氛濁中原旣滌蕩長驅出秦蜀河湟聚花門妖彗
互地軸金城照組練玉門塞戈鋌孤軍轉戰前所至無
悍族天山水峩峩雪夜萬騎蹴堅壘悉蹋平西域國州

六直抵伊列河犁庭獮禽鹿偏師拓疏勒中屯鎮溫宿

公駐阿克蘇最久

丁零亦請吏回紇胥受東漸次興耕桑遺黎

知誦讀稍暇歌投壺禮士若不足我友施士丐豪氣讎視俗謫宦依幕府軍諮力推轂論功歸飲至入 覲天

顏穆 詔濬長安渠萬指瘁畚揭 帝命還左班寵以

八坐祿旌節撫青齊鳧藻滿川陸陽侯忽遘災淮濟并窮瀆一身填橫流長隄斬山谷瓠子幸告成袞衣去何速公家本始甯我生共鄉曲遠道無一面同聲致遐矚京華喜相見深談屢跋燭傾吐悉肝膈倚仗勝骨月昔冬貽我書憂 國淚可掬海寓多伏莽宿將半墓木根

本東三省強虜正眈目欲及身未老盡瘁捍邊牧我書
未及報公訃已來告齋志視青冥百身竟莫贖豈止海
岱間瀕河萬家哭 右張勤果公

文介起科第浮湛戶曹郎烈烈胡文忠一疏揚明堂
清節比廉范心計如孔桑出司鄂軍餉千里無見糧忠
義相激發士馬日騰驤用其治賦功遂落機槍芒積漸
受 主知三遷專齊疆強力故不怠所至蘇疲毗 內

召副司空堅臥還虞鄉 今上元二灾三晉尤凋傷赤

地無遺黎存者爲強糗公時投袂起曾袁相扶將

謂晉撫曾

忠襄公侍郎
袁文誠公

內骨逮秦豫畿輔資屏障

平

詔拜大司

徒國計倚以強遂綜會計簿扶弊先持綱墨敗劾貪吏
巨蝨鋤奸商 帝心益眷注密勿參巖廊遂正中書席
主聖知臣良孤立無黨與眾沸成蝮蟪屢疏爭不勝
去 國心傍徨養老乏上尊優秩無月羊余時居曹署
散拙守故常朝謁屢移病不識金與倉公意獨延竝音
問時琅琅屢欲強之起羣力期勸頗病公刻覈束溼
無舒長引義與公爭氣亢詞過剛公顧听然聽直諒無
它腸公既不安位我亦辭周行同官有袁宏謂爽問訊
公在牀猶傳太息言殷勤詢行藏公今歸帝所我忝司
臺章緘默取充位月日常憂傷寢門泣公訃秦樹雲蒼

茫 右閣文介公

鴻臚嶺南秀忼慨人中英少年取鄉賦入訾繫華纓浮
湛白雲署錄錄不自名一朝擢諫官建樹何諍諍 至
尊初御極親賢秉鈞衡 東朝再莅政堯舜有 孝貞
納諫如不及上書日有程延英立召對朝奏夕已令羣
少厲鋒氣危言恣彈抨有失不爾罪微善必予旌宦豎
皆側目出入莫敢撓漸致召朋黨報復仇萌君時婁拜
疏所言皆至誠亂始務防漸倖門先塞庚事或關國體
雖小必力爭 兩宮婁嘉歎手疏示公卿讀者爲流汗
邪佞相驚憂門庭日羅雀圖史無觴觥時時過子語大

厦期共堂私憂八關輩水火滋軋傾鬼域恐壞事有累
朝廷明世事易翻覆朝局如楸枰自詡稷契輩摧落
同枯莖羣憤破轍出一牛負重耕晉秩大鴻臚銜 詔
事遐征單騎出絕域拂菻方縱橫交南已吞噬嶺表方
窺偵荆國主棄地扶風欲逃盟君獨苦撐柱犁耜大呼
訇黻黻鬼門關毒霧天爲赭巨虺上樹立飛鳥晝不攫
醜夷更肆毒絕食陳鬼兵刀戟積雪列礮火殷雷轟從
官半瘡沒 廷議戒債成君獨以死誓終得持輸平還
歸見 天子造鄰陳哀鳴臣力此已竭戎心猶未盈幸
不辱 國命乞骸終餘生 長樂爲感動 溫旨固留

行君復過余言進退心忤忤已中要人忌留去何重輕
臣衰况親老白華猶可營誠知 聖恩厚庶幾全萊嬰
歸臥白鶴峰足不來羊城奈何鵬鳥災玉棺遽下迎老
母猶在堂長夜目不瞑平生膠漆感事予猶事兄一朝
訃音至祝予老淚并婚媾竟未就稚子哀孤惇君最愛第四子
常攜以見余爲求佳對余欲以從孫女議昏適君告養歸而余孫女在里門遂輟議云爲君賦大
招靈車還 帝京搔首白髮短日莫傷我情持此問邪

老瓊海喏悲鯨

謂播孺初時歸瓊州

右鴻臚鄧君

文恪席華貫黃羊承遠裔儒學守素風三晉首門第相
國佐 宣宗益以大其世公幼稟庭誥淡泊自約制相

國致政歸徒步赴上計系踵登承明廉靜忘貴勢回翔
臺閣間所職祇辭藝篠蕩皇華榮黼黻卿雲麗廉泉不
自潤車服日以儉國是正多艱退食常泣涕馴至九
列崇志欲四海濟危言激同僚清節率羣吏泊拜大司
空壹志釐夙弊故事分六官戶工職金幣利藪害所叢
蠅蚋競嘍嘑營繕今將作都虞筦水利慕擅尤紛貶逐
臭類狂獠不問職所守祇爭骨可噬妄言效禽行脅肩
更脩睇旁觀爲泚汗一家得甘毳公本嫉惡嚴力欲振
頽滯屹然中流間左右苦牽曳眾濁憎獨清孤掌支羣
擠奈何不憚遺居位甫踰歲易簣餘空籬玲斂無複製

中藏出賜金債家已門逮公癯美鬣須煦姬在辭氣
其中秉剛強匪石不可礪我生與公疏性分有神契我
晚始入臺公聞喜投袂庶幾鳴鳳來一旦豁氛棼逡遁
未卽發公叟道我噫不謂遽騎箕九京得無憐鉛刀遲
一割日中必致蕘餘生一息存此心千古口蕭然總帷
寒沈疴不能詣公在賓時余以病足不能往弔心常蹙然終期芹曝獻當公
絮雞祭三歎四君詠豈止哀已逝 右祁文恪公

梁文忠病中寄贈鄧鐵香鴻臚奏議刻本文忠書中言
鴻臚畫界受瘴病未三日卽棄母而死吾輩無不痛惜
其孤搜集遺稿刻成寄京今以一部分贈此公所欲看

之書也忠直清諫中無他腸同時言官未有其比今已
矣覽其遺書恍如在宏衍庵旁書窗對論時也世亂思
賢吾輩當何如哉余輯讜言錄采鴻臚奏摺數首今得
讀此集多昔所未見者忠鯁切直如見其人

長沙王葵園師詩學杜陵平生不輕作投贈余兩至湘
其後皆以疾告歸甲辰去湘師以詩贈行云廿年不踏
長安地夢想朋游醉文字聞君持節渡湘來喜入燈花
照無睡知君慧眼湘月明信君澄懷湘水清賢名一日
播萬口邦人引領神先傾甄文掾弊不遑恤遠接朱張
肯甫變釣
兩學使
近無匹乘輶崔浩時共榮奏賦相如自稱疾

王程三載甫經年何意告別無留連君身豈藉官職重
所借多士無良緣明廷袞袞登英傑不信扶危少施設
育才堂館高切雲勸學文書紛似雪樹人敢謂非嘉謀
城社狐鼠難可搜狂夫橫議懼民散相忍得非根本憂
我今伏處成衰暮箝口藏身真自悞君雖暫歸行入

朝莫忘青蒲陳諫疏已酉余感時局泯歎有去志師見
余和金甸丞太守句惜余之將去也有七言古一章見
示云自修學使見示和甸丞詩有山中故人昨有書
底荷衣行料檢之句再次韻奉柬憶昔學館誇同年費
雲舫吳望雲編修祭酒聯步先歸田蘇臺攜手雜嘲笑我亦行謝

區中緣平生體性慙質直捷足甘輸當世特尙喜時多
箕頽流堯天不改蒼蒼色翻思袁許死建白我時倖作
懸輿客苟免偷生直到今蹙蹙空爲元化役羨君湛露
晞朝陽天庭騰上肩間黃清標學業有繼起珂里似是
高陽鄉教思爲澤文爲江千里春風綠楚莊荷衣漫續
靈均製虎氣龍身安可降長君一日吾誠忝李翰枯澀
羊欣儉乞書枉贈瑤華篇更啟金壺五龍檢王子余辟
地海上以詩寄師平江師有和作云中土餘殘局當年
仗一流嗟傷樊柳晚聳懼及瓜秋雷電生千嶂江湖吐
百洲與君睽隔意兩地感羈囚夢寐乾坤窄風塵歲月

徂直愁廿年後無復一人儒浮海君先將傳經子作徒
和詩聊自壯鄰德不嫌孤錄之以見吾師相愛之意

湘潭趙芷生提學啟霖官御史性剛直以言事得罪去
余電趣還湘請監督高等學堂比過武昌張文襄留主
存古學堂講席文襄內召芷生謝歸余堅請主高等學
堂未幾詔復原官尋簡四川提學使先後有贈余詩
數章芷生學行在湘中士大夫當首屈一指余所最心
折者一別十稔世變瀕洞乃至於此錄其詩益不勝今
昔之感云詩凡五章其一曰千年道術何曾囿一代宗
風匪易任稍見斲輪成大輅翻從躍冶鑄祥金柔坏剛

顛艱難日聖伏神徂繾綣心獨愧支離疎磬效滄州回
首又春陰其二曰天涯何處識春歸盡日輕陰對掩扉
澗草漸生還漸長山禽時止亦時飛流年坐覺成新故
薄醉何容著是非冉冉春光堪悵望湖波添漲上苔磯
其三曰不將春事細平章誰信郊居氣味長海燕歸來
爭解語園蜂簇處但憐香清明風日銷詩句爛漫江山
寄草堂三尺漁竿吾道在濯纓猶自有滄浪其四曰三
年已感離羣久萬里何堪別路長邛鉅偎依成小聚鷹鷂
寥闊不同行軒昂謨議隨青瑣牢落心情撫阜囊獨有
韋弦珍重意鳴雞風雨道難忘其五曰巫陽雲雨自朝

昏何處登樓望九門夢寐從君心莫逆蹉跎憐我舌徒
存橫流祇爲斯文懼方枘知非末俗尊目盡天涯春色
晚湘濱回首長荃蓀余去湘芷生以述別五古一章見
貽詩云三古重教學大旨明人倫陶化既有具遂使風
俗純誕章逮乖離斯文賴彌綸百世其可知損益相環
循斷斷濟時策變通謂宜民興學議初起捫然語更新
道器本該貫往訓故未湮云何事勦說鹵莽爲一鈞牛
從忘雞尸坐致諸夏淪夫子信宗匠宇量淵且醇爰初
蒞湘浦士氣驕不馴公謂詖邪詞譁躁乃無垠從容董
其綱隳括實苦辛持剛而劑柔誠勉抑何諄不動聲與

色庠序還莘莘三年畏壘居輿情始歸仁若非鎮羣咙
僨張爲禍鄰湖外今謚如此功難具陳逝將理歸鞅誰
歟嗣清塵猗彼子衿徒朝夕視北辰風采所範圍隱紆
國步頻洵洵九州間飄搖會艱屯吾道要有託貧矣休
天均賦分愧蹇拙子立少依因長者不遐棄垂眷意益
肫側身望橫流欲濟茫無津離心浩難裁緒言若爲親
惟祝松筠姿後彫在自珍

華陽縣城東宋文憲公祠墓咸豐元年 先大父官蜀
藩嘗捐奉重修越五十年慶坻重至蜀謁祠芬燎剝陟
榛莽塞路乃與同鄉同官醵金補葺復還舊觀祠中有

清風亭明月池青蘿山房潛溪別墅落成而祭爲文勒石以記其事並補刻先大父昔日記事詩於石同里王詠齋丈詩人也成六絕句云儵忽飛光五十春疏鐘細磬沈梳塵空餘狔穿雞埒地零落弦歌雅誦人石馬金鳧委斷蓬蕭騷落盡古青楓可憐華表無歸鶴誰薦寒泉酌殯宮使者風流冠世賢温温祖德述當年金邊玉豆重蠲絜一曲迎神咽素絃披榛乍見石龜趺薜碣苔碑手自墓生恐牧童更敲損遺邱分付禁樵蘇點綴煙螺一簣山歸思繚繞故鄉闕清風明月曾無恙合補青蘿宿翠鬟話到難噴息同狂瀾誰障百川東登堂三

拋靈解鼓髣髴駘下太空

蕉廊脞錄卷六終